



Un tagliuorn da naiv cumainza a rumir la naiv sün via, davo rivan nanpro eir las maschinas plü grondas per rumir lavinas e scufflas.

## Il sön d'inviern es a fin

Pass dal Flüela: Cumanzà cullas lavuors da rumida

DA ROMANA DUSCHLETTA / ANR

■ **La società Pro Flüela s'ingascha eir quist on fermamaing per pudair drivir il Pass dal Flüela pel termin previs dals 1. mai. Las lavuors da rumir la naiv sülla via dal pass han cumanzà.** Illas muntognas esa quista prümavaira amo naiveras. Per cha la via dal Pass dal Flüela possa gnir drivida pel principi da mai s'haja cumanzà cun la rumida da naiv. L'uniun Pro Flüela fa tuot il pussibel per pudair tgnair avert il pass fin il cumanzamaint da schner e per til drivir il principi dal mais mai. Cul sustegn finanziel da la populaziun e d'instituziuns indigenas e per part eir dal chantun cumbatta la Pro Flüela per cha la via dal pass resta durant l'on plü lösch pussibel transibla per tuot il trafic. Il Pass dal Flüela es üna colliaziun importanta per l'Engiadina e vain tratta a nüz dad indigens e giasts.

### Lavuors privlusas

Las naiveras illas muntognas difficuleschan la lavur per rumir la via dal Pass dal Flüela. D'incuort s'ha *Jürg Mayolani*

da Zernez, respunsabel per quistas lavuors da rumida, instradà cun sias maschinas vers il pass. Cun duos chargiadiers pneumatics, ün da 28 tonnas cun üna pala da 5,5 meters cubic, ün da 18 tonnas cun ün tagliuorn da naiv, duos tagliuorns sün roudas ed ün a tschintun ha'l cumanzà cullas lavuors. Dürant il di vegn deliberada la via da la naiv in lös ingio chi nun es privel da lavinas. Però sco cha *Jürg Mayolani* manzuna sun eir quels lös adüna ün privel potenzial. Las otas temperaturas dürant il di pon chaschunar ruttivas o eir boudas. «Dürant la lavur es il sguard suvent sü vers las costas», disch el. Il respunsabel pella sgürezza sün via es *Jürg Rocco* da Tavo. El survaglia il privel da lavina durant las lavuors da rumida. Las lavinas vegnan rumidas durant la not. Là sun las temperaturas plü bassas ed il privel da lavina es plü pitschen. Tuot tenor quanta naiv chi's rechatta süllas costas in vicinanza da la via vegnan tunadas giò la lavinas per diminuir il privel pels lavuraints. Ün oter privel es la via chi'd es amo inglatschada suot üna vetta da naiv. Sco cha'l respunsabel per las la-

vuors da rumida declera sglishan las maschinas, adonta las chadainas, be per quai suot. «In quella situaziun esa dad esser enorm concentrà, perche in ün batterdögl as poja fingià esser giò per üna costa», disch *Jürg Mayolani*.

### La gronda lavur tils spetta sün l'ospiz

Sco ch'el disch van las lavuors bain invariant. Tenor ils respunsabels esa però süsom il pass daplü naiv co l'on passà. Là vain il prüm rumida la via, chi'd es cuvernada cun naiv fin a trais meters otezza, cul tagliuorn a tschintun. «Cun quella maschina vain büttada davent la naiv vetta per vetta, fin sün l'otezza chi's riva tras ils mantuns culs tagliuorns sün roudas», declera *Jürg Mayolani*. Daspö nouv ons es el respunsabel per las lavuors da rumida. «Cha'l Pass dal Flüela saja ün pass be surprais», constata'l, «l'ora as po müdar dandettamaing e cun quai eir metter suotsura tuot il program da lavur.» L'on passà per exaimpl, sco cha'l respunsabel da las lavuors da rumida s'algora, es la saira avant l'avertüra dal pass crodada amo boscha e crappa sün via causa fermes bofs.



Per rumir la via dal pass durant las lavuors da rumida trais fin quatter eivnas.

FOTOS R. DUSCHLETTA

## Guarda survain resposta positiva

Cumün po far part da la fusiun cun Scuol e contuorns


■ **(anr/fa) Il cumün da Guarda less far part dal proget da fusiun dals cumüns d'Ardez fin Sent. La grupp da quist proget es pronta d'integrar eir a Guarda in lur fusiun, fa però üna cundiziun.**

Als 21 gün 2012 vaivan ils votants da Guarda refüsà cun 35 cunter 32 vuschs il proget chi prevezzaiva da fusiunar lur cumün culs cumüns da Zernez, Susch e Lavin. La mità da december vaiva decis la radunanza cumünala da Guarda in üna votumaziun consultativa na tractandada da vulair entrar in trattativas per far part da la fusiun dals cumüns d'Ardez, Ftan, Scuol, Tarasp e Sent. La grupp da proget chi consista dals capos cumünals *Jonpeider Strimer* (Ardez), *Reto Pedotti* (Ftan), *Jon Domenic Parolini* (Scuol), *Christian Fanzun* (Tarasp) ed *Albert Mayer* (Sent) ha trattà quista dumonda. In lündeschdi ha ella dat part il resultat da lur trattativas: «No vain constatà cha la radunanza cumünala da Zernez ha decis a la fin da favrer da vulair tscherchar danouvamaing il dialog per fusiunar, quista jada però be cun Susch e Lavin», ha infuormà *Christian Fanzun*, il president da la grupp da proget pella fusiun da Scuol e contuorns. Quai demuossa tenor el cha Guarda nu farà part dad ulteriurs progets illa part sura da l'Engiadina Bassa. «Perquai eschan no pronti d'acceptar al cumün da Guarda i'l perimenter da la fusiun», ha'l dit, «però be culla cundiziun cha la dumonda dal cumün as ba-

sa sün üna decisiun officiala, tratta d'üna radunanza cumünala convocada culla tractanda correspudenta.»

### Radunanza in bundant quindesch dis

Quista radunanza es sco cha *Maria Morell*, la presidenta cumünala da Guarda, orientescha, als 24 d'avrigl. «Pro nossa radunanza in december vaivna vulgü dudir scha las votantas e votants in cumün sajan in general cunter fusiuns da cumüns o schi d'eiran be cunter la fusiun vers insü», ha'la manzunà, «tuot ils votums da quella saira vaivan muossà ch'üna fusiun gniss bainschi acceptada, però na il tagl tanter Guarda ed Ardez.» Ch'ella vezzaiva blers avantags ed eir dischavantags pro üna fusiun vers amunt, ha cuntinuà *Maria Morell*, «eu vez però listess blers avantags e dischavantags, forsà ün pa in oters regards, pro üna fusiun vers aval.» Chi sarà uossa da chattar la megldra via, conclud'la, «pro fusiuns esa adüna ün dar ed ün tour fin chi's chatta la meldra via, eu pens cha quai giarà schon.» Da la resposta positiva es gnü a savair eir il cuvi da *Lavin Linard Martinelli*: Chi saja gnü giavüschà da plüs votants in radunanza cumünala cha'l magistrat cumünal dessa verer schi nu füss pussibel ch'eir Lavin fess part da la fusiun dals cumüns intuorn Scuol, ha'l dit, «la grupp da lavur dal proget da fusiun es infuormada in chosa, uossa reponderaina i'l magistrat la situaziun ed infuormain a temp ütil davart noss prossems pass.»



Aviöls da l'apicultur *Jim Fischer* chi svoulan immez la cità da New York.

MAD

## Aviöls furtünats in cità e muntogna

Lavur dals apicultuors a New York ed in Engiadina

■ **(anr/fa) Il film documentar «per amur da l'avieul» nun es ün film davart la muria d'aviöls globala: Il tema dal film da *Flurina Badel* es blierant la lavur e la paschiun dals apicultuors in grondas citads e pitschens cumüns.** Dürant ün sogiuorn a Manhattan ha cumprà l'artista e schurnalista engiadinaisa *Flurina Badel* sün l'Union Square Farmer's Market ün magölin meil da New York. Tuot surpraisa da quai ha'la dumandà al vendader schi detta propcha apicultuors eir d'immez la gronda metropola. Quel ha confermà quai e dit chi detta numerusas persunas chi tegnan aviöls illa gronda cità. Quai ha svaglià il buonder da la figlia d'ün apicultur paschiunà da Guarda: *Flurina Badel* ha decis da far ün film documentar davart dals apicultuors illa metropola ed eir in muntogna e co ch'els lavuran cun lur aviöls. Il film vegnan a pled dad üna vart *Jim Fischer* e *Lucia Hernandez*, duos apicultuors a New York. *Fischer* es expert per aviöls e dà a Manhattan cuors per api-

cultuors. *Hernandez* abita illa Bronx, ün dals quartiers povers da la cità da New York. Seis aviöls lascha ella svolar in ün pitschen parc da quist quartier. Da tschella vart s'ha chattada la cineasta in Engiadina cun *Balti Willy* da Zuoz, il president da l'Uniun d'apicultuors Engiadina. Quel s'ingascha per ch'eir giuvnas e giuvens imprednan a far d'apicultuors. «Sainza la chüra da l'apicultur nu pon survivor ils aviöls pro nus, ma fintant chi dà apicultuors daja eir aviöls in Engiadina.» La seguonda apicultura engiadinaisa i'l film es *Claudia Thom* da Seraplana, eir ella ha gronda paschiun pella lavur culs aviöls. Il film ha pudü gnir realisà grazcha a la collavuraziun culla Televisiun Rumantscha.

La premiera dal film «per amur da l'avieul» es in marcurdi, als 10 avrigl a las 19.00 illa Seletta a Zuoz, als 14 avrigl a las 15.00 vain muossà il film a Guarda in chasa da scoula. La Televisiun Rumantscha emetta il film i'ls Cuntrasts da dumengia, ils 21 avrigl a las 17.25 sün SFR1.